

15 MAY 2000

Hishammuddin-Belia

PROGRAM LAPUK AKAN DIHENTIKAN, KATA HISHAMMUDDIN

KUANTAN, 15 Mei (Bernama) -- Program-program yang lapuk yang membabitkan golongan belia di negara ini akan dihentikan, kata Menteri Belia dan Sukan Datuk Hishammuddin Tun Hussein hari ini.

Beliau berkata Kementerian itu juga akan mempertingkatkan tinjauan dan kajian terhadap golongan belia untuk memahami generasi muda dan memastikan program-program dapat diatur sesuai dengan tuntutan belia.

"Kerajaan mengalu-alukan kritikan membina daripada belia untuk memperkukuhkan rancangan bersama. Di samping itu saya juga meminta belia mendekati kerajaan untuk mempertingkatkan kesefahaman dan muafakat," katanya.

Beliau berkata demikian semasa berucap pada Perhimpunan Hari Belia Negara 2000 di Stadium SUKPA, di sini yang dirasmikan oleh Perdana Menteri Datuk Seri Dr Mahathir Mohamad.

Hishammuddin berkata pandangan dan pendapat golongan muda harus diberi perhatian sewajarnya untuk membantu mereka menyuarakan aspirasi, isu dan kebimbangan bersama.

Menurutnya, negara yang sensitif terhadap suara generasi muda akan berpeluang mendapat cetusan fikiran dan idea baru mengenai bagaimana boleh membentuk sebuah masyarakat yang dinamik dan terbuka.

Ini boleh dilakukan menerusi dialog dan perbincangan dengan golongan belia, yang akan lebih bermakna dan berkesan sekiranya saluran yang betul dan mantap digunakan, kata beliau.

Katanya Kementerian itu akan menggerakkan semula Majlis Perundingan Belia Negara (MPBN) sebagai satu forum penting bagi tempat golongan itu menyuarakan pendapat dalam isu yang berkaitan.

Katanya, majlis itu akan disusun semula untuk penyertaan ramai dan Dr Mahathir sudah bersetuju menaikkan taraf MPBN ke status yang seiring dengan Majlis Perundingan Ekonomi Negara (MAPEN) agar ianya dapat berfungsi dengan lebih berkesan.

Beliau mengingatkan golongan belia supaya memperluaskan diri dengan perwatakan luhur serta bersikap positif, berbudaya cemerlang, semangat yang kental serta menguasai ilmu dan kemahiran.

Perangkaan terkini menunjukkan golongan belia di Malaysia berjumlah 9.8 juta orang atau 43 peratus daripada jumlah penduduk negara. Sebanyak 5.1 juta adalah lelaki dan 4.7 juta perempuan, yang dianggap sebagai aset dan sumber manusia terpenting negara.

Pada majlis itu Perdana Menteri turut menyampaikan anugerah belia negara dalam 11 kategori termasuk anugerah bagi kategori persatuan yang dimenangi oleh Persatuan Belia Serdang Jaya.

Universiti Putra Malaysia (UPM) memenangi anugerah bagi agensi kerajaan manakala Tractors Malaysia (Bhd) bagi agensi swasta. Anugerah tokoh khas dimenangi oleh Prof Madya Dr Asiah Sarji dan bekas Menteri Besar Pahang Datuk Abdul Rashid Abdul Rahman.

Dr. Mahathir turut menyampaikan replika kunci rumah Program Pembangunan Rakyat Termiskin (PPRT) kepada lima penerima yang tinggal di Kampung Balok.

Pembinaan rumah tersebut dilaksanakan secara gotong-royong oleh 400 peserta khemah kerja anjuran Kementerian Belia dan Sukan sempena perhimpunan itu dengan kerjasama Kemanterian Pembangunan Luar Bandar dan kerajaan Pahang.

-- BERNAMA

SHS NMO